

四庫全書

集部

欽定四庫全書

集部

晦庵集卷八十五

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣葉蘭

謄錄監生臣張元任

欽定四庫全書

晦庵集卷八十五

宋 朱子 撰

銘 箴 贊 表 疏 啓 婚書 上梁文

講座銘

紹興二十三年新安朱熹仲晦來為吏於同安而兼領其學事越明年五月新作講座以臨諸生顧其所以作之意不可以不銘銘曰

師道絕塞以圯其居令其言言亦莫我敢都前聖後師

文不在茲如或見之有儼其思立之堂壇惟以有嚴厥
臨孔昭式訛爾瞻

四齋銘

志道

曰趨而挹者孰履而持曰飢而寒者誰食而衣故道也
者不可須臾離子不志於道獨罔罔其何之

據德

語道術則無往而不通談性命則疑獨而難窮惟其厚

於外而薄於內故無地以崇之

依仁

舉之莫能勝行之莫能至雖欲依之安得而依之為仁
由己而由人乎哉雖欲違之安得而違之

游藝

禮云樂云御射數書俯仰自得心安體舒是之謂游以
游以居嗚呼游乎非有得於內孰能如此其從容而有
餘乎

鼓銘

擊之鏜兮朝既暘兮巧趨蹌兮

至樂齋銘

葉學古讀書蕭寺取歐陽子詩語名其室曰至樂紫
陽朱熹仲晦父實為之銘

呻吟北窓氣鬱不舒我讀我書如病得甦客問此書中
作何味君乃嗜之如此其至趣為子語無味乃然是有
味者乃瘡乃羶天下之樂我不敢知至歐陽子乃隸斯

詩我思古人實感我心惟曰惜惜式鈎且深

南劍州尤溪縣學明倫堂銘

天敘有典匪學弗明我作此堂大猷是經匪忠曷勸匪
孝曷程咨爾學子永觀厥成

又四齋銘

崇德

尊我德性希聖學兮玩心神明蛻污濁兮

廣業

樂節禮樂道中庸兮克勤小物奏膚公兮

居仁

勝己之私復天理兮宅此廣居純不已兮

由義

羞惡爾汝勉擴充兮遵彼大路行無窮兮

學古齋銘

浦城周侯嗣恭葺其先大父徽猷公所作學古齋以
教齊宗族子弟新安朱熹為題其榜周侯又來請銘

則推其意乃作銘曰

相古先民學以為己今也不然為人而已為己之學先
誠其身君臣之義父子之仁聚辨居行無怠無忽至足
之餘澤及萬物為人之學熒然春華誦數是力纂組是
誇結駟懷金煌煌煒煒世俗之榮君子之鄙維是二者
其端則微眇綿弗察胡越其歸卓哉周侯克承先志日
新此齋以迪來裔此齋何有有圖有書厥裔斯何衣冠
進趨夜思晝行咨詢謀度絕今不為惟古是學先難後

獲匪亟匪徐我其銘之以警厥初

尊德性齋銘

內弟程允夫以道問學名齋予謂當以尊德性易之
允夫請銘因為作此

維皇上帝降此下民何以予之曰義與仁維義與仁維
帝之則欽斯承斯猶懼弗克孰昏且狂苟賤汙卑淫視
傾聽惰其四肢褻天之明慢人之紀甘此下流衆惡之
委我其監此祇栗厥心有幽其室有赫其臨執玉奉盈

須臾顛沛任重道遠其敢或怠

敬恕齋銘

莆陽陳師中讀書之室新安朱熹題以敬恕且為之
銘

出門如賓承事如祭以是存之敢有失墜已所不欲勿
施于人以是行之與物皆春胡世之人恣已窮物惟我
所便謂彼奚卹孰能反是斂焉厥躬于牆于羹仲尼仲
弓內順于家外同于邦無小無大罔時怨恫為仁之功

曰此其極敬哉恕哉永永無斁

求放心齋銘

番陽程正思作求放心齋汪子卿祝汝玉既為之銘
新安朱熹擬其遺意復為作此

天地變化其心孔仁成之在我則主于身其主伊何神
明不測發揮萬變立此人極晷刻放之千里其奔非誠
曷有非敬曷存孰放孰求孰亡孰有屈伸在臂反覆惟
手防微謹獨茲守之常切問近思曰惟以相之

書字銘

明道先生曰某書字時甚故非是要字好只此是學
握管濡毫伸紙行墨一在其中點點畫畫放意則荒取
妍則惑必有事焉神明厥德

劉屏山復齋蒙齋二琴銘

屏山先生之琴二其嗣子珥葆藏之門人朱熹敬為
作銘

匪金匪石含玉真兮雷伏于腹閱其神兮砰然一作萬

物皆春兮我觀器寶懷若人兮主靜觀復修厥身兮與

時偕屈而不及其伸兮

復齋

抑之幽然者若直其遇險而止寫之冷然者若導其出
山之泉蓋先生之言不可得而聞矣若其亨貞之意則

託茲器而猶傳

蒙齋

黃子厚琴銘

黃子琴號純古晦翁銘之

無名之樸子所琴兮扣之而鳴獲我心兮杳而弗默麗

弗淫兮維我知子山高而水深兮

紫陽琴銘

養君中和之正性禁爾忿欲之邪心乾坤無言物有則
我獨與子鈎其深

尺銘

有蠱其經有棘斯緯字體變化忽與神會倨句如矩其
繩則直我端我躬允相茲尺

又

魯曾氏作斯器正文字畀來系

窗銘

言思變動思躓過思棄端爾躬正爾容一爾衷

寫照銘

乾道九年歲在癸巳予年四十有四而容髮凋悴遽已
如此然亦將修身以畢此生而已無他念也福唐

闕

元為予寫照因銘其上以自戒云

闕

端爾躬肅爾容檢於外一其中力於始遂其終操有要

保無窮

題魏府藏趙公飲器

趙公飲器魏府藏我思兩公愛甘棠惟魏子孫寶無數
敬奉其盈如弗克平陵朱熹拜手書

魏國公府犀爵銘

丞相趙公所魏公者

天水公屹堂堂舉兕爵孰敢當惟魏公一心膺受藏之
永終古後之人奉其盈如不克視熹銘

懷玉硯銘

我輯墜簡大法以存孰摯其實使與斯文點染之餘往

壽逋客墨爾毫端毋俾玄白

慶元丁巳
三月庚子

懷玉南谿近出此石徐斯遠以予方討禮篇持以為
贈會分半稿以屬呂子約於高安因掇寄之慶元強
圉大荒落日南至晦翁記

藏書閣書厨字號銘

於穆元聖繼天測靈出此謨訓惠我光明永言寶之匪
金厥籛含英咀實百世其承

敬齋箴

讀張敬夫主一箴擬其遺意作敬齋箴書齋壁以自警云

正其衣冠尊其瞻視潛心以居對越上帝足容必重手容必恭擇地而蹈折旋蟻封出門如賓承事如祭戰戰兢兢罔敢或易守口如瓶防意如城洞洞屬屬罔敢或輕不東以西不南以北當事而存靡他其適弗貳以二弗參以三惟精惟一萬變是監從事於斯是日持敬動

靜無違表裏交正須臾有間私欲萬端不火而熱不冰而寒毫釐有差天壤易處三綱既淪九法亦斁於乎小子念哉敬哉墨卿司戒敢告靈臺

調息箴

鼻端有白我其觀之隨時隨處容與猗移靜極而噓如春沼魚動極而翕如百蟲蟄氤氳開闢其妙無窮孰其尸之不宰之功雲卧天行非予敢議守一處和千二百歲

易五贊

原象

太乙肇判陰降陽升陽一以施陰兩而承惟皇昊義仰
觀俯察竒耦既陳兩儀斯設既幹乃支一各生兩陰陽
交錯以立四象竒加以竒曰陽之陽竒而加耦陽陰以
章耦而加竒陰內陽外耦復加耦陰與陰會兩一既分
一復生兩三才在目八卦指掌竒竒而竒初一曰乾竒
竒而耦兌次二焉竒耦而竒次三曰離竒耦而耦四震

以隨耦奇而奇巽居次五耦奇而耦坎六斯睹耦耦而奇艮居次七耦耦而耦八坤以畢初畫為儀中畫為象上畫卦成人文斯朗因而重之一貞八悔六十四卦由內達外交易為體往此來彼變易為用時靜而動降帝而王傳夏歷商有占無文民用弗彰文王繫彖周公繫爻視此八卦二純六交乃乾斯父乃坤斯母震坎艮巽離兌女離南坎北震東兌西乾坤艮巽位以四維建官立師命曰周易孔聖傳之是為十翼遭秦弗燼及宋

而明邵傳義畫程演周經象陳數列言盡理得彌億萬
年永著常式

述旨

昔在上古世質民淳是非莫別利害不分風氣既開乃
生聖人聰明睿智出類超羣仰觀俯察始畫竒耦教之
卜筮以斷可否作為君師開鑿戶牖民用不迷以有常
守降及中古世變風移淳澆質喪民偽日滋穆穆文王
身蒙大難安土樂天惟世之患乃本卦義繫此彖辭爻

及周公六爻是資因事設教丁寧詳密必中必正乃亨
乃吉語子惟孝語臣則忠鈞深闡微如日之中暨乎末
流淫于術數儂句成欺黃裳亦誤大哉孔子晚好是書
韋編既絕八索以祛乃作彖象十翼之篇專用義理發
揮經言居省象辭動察變占存亡進退陟降飛潛曰毫
曰釐匪差匪謬加我數年庶無大咎恭惟三古四聖一
心垂象炳明千載是臨惟是學者不本其初文辭象數
或肆或拘嗟予小子既微且陋鑽仰沒身奚測奚究匪

警滋荒匪識滋漏維用存疑敢曰垂後

明筮

倚數之元參天兩地衍而極之五十乃備是曰大衍虛
一無為其為用者四十九著信手平分置右於几取右
一著掛左小指乃以右手揲左之策四四之餘歸之于
扚初扚左手無名指間右策左揲將指是安再扚之奇
通掛之筭不五則九是謂一變置此掛扚再用存策分
掛揲歸復準前式三亦如之奇皆四八三變既備數斯

可察數之可察其辨伊何四五為少八九為多三少為九是曰老陽三多為六老陰是當一少兩多少陽之七孰八少陰少兩多一既得初爻復合前著四十有九如前之為三變一爻通十八變六爻發揮卦體可見老極而變少守其常六爻皆守彖辭是當變視其爻兩兼首尾變及三爻占兩卦體或四或五視彼所存四二五一二分一專皆變而他新成舊毀消息盈虛捨此視彼乾占用九坤占用六泰愕匪人姤喜來復

稽類

八卦之象說卦詳焉考之於經其用弗專象以情言象以象告惟是之求斯得其要乾健天行坤順地從震動為雷巽入木風坎險水泉亦雲亦雨離麗文明電日而火艮止為山兌說為澤以是舉之其要斯得凡卦六虛竒耦殊位竒陽耦陰各以其類得位為正二五為中二臣五君初始上終貞悔體分爻以位應陰陽相求乃得其正凡陽斯淑君子居之凡陰斯慝小人是為常可類

求變非例測非常曷變謹此為則

警學

讀易之法先正其心肅容端席有翼其臨于卦于爻如筮斯得假彼象辭為我儀則字從其訓句逆其情事因其理意適其平曰否曰臧如目斯見曰止曰行如足斯踐母寬以略母密以窮母固而可母必而通平易從容自表而裏及其貫之萬事一理理定既實事來尚虛用應始有體該本無稽實待虛存體應用執古御今由靜

制動潔靜精微是之謂易體之在我動有常吉在昔程氏繼周紹孔奧旨宏綱星陳極拱惟斯未啟以俟後人小子狂簡敢述而申之

復卦贊

萬物職職其生不窮孰其尸之造化為工陰闔陽開一靜一動於穆無疆全體妙用奚獨於斯潛陽壯陰而曰昭哉此天地心蓋翕無餘斯闔之始生意翕然具此全美其在于人曰性之仁斂藏方寸包括無垠有茁其萌

有惻其隱于以充之四海其準曰惟茲今眇綿之間是用齋戒掩耳閉關仰止義圖稽經協傳敢贊一辭以詔無倦

六先生畫像贊

濂溪先生

道喪千載聖遠言湮不有先覺孰開我人書不盡言圖不盡意風月無邊庭草交翠

明道先生

揚休山立玉色金聲元氣之會渾然天成瑞日祥雲和
風甘雨龍德正中厥施斯普

伊川先生

規員矩方繩直準平允矣君子展也大成布帛之文菽
粟之味知德者希孰識其貴

康節先生

天挺人豪英邁盖世駕風鞭霆歷覽無際手探月窟足
躡天根閑中令古醉裏乾坤

橫渠先生

早悅孫吳晚逃佛老勇撤臯比一變至道精思力踐妙
契疾書訂頑之訓示我廣居

涑水先生

篤學力行清修苦節有德有言有功有烈深夜大帶張
拱徐趨遺象凜然可肅薄夫

張敬夫畫象贊

亡友荊州牧張侯敬夫畫象新安朱熹為之贊曰

擴仁義之端至於可以彌六合謹善利之判至於可以
析秋毫拳拳乎其致主之切汲汲乎其幹父之勞兀兀
乎其任道之勇卓卓乎其立心之高知之者識其春風
沂水之樂不知者以為湖海一世之豪彼其揚休山立
之姿既與其不可傳者死矣觀於此者尚有以卜其見
伊呂而失蕭曹也耶

呂伯恭畫象贊

括蒼潘君叔度畫其先師東萊呂氏伯恭父之象于

可菴退老堂之上曰使西河之民毋疑我於夫子也
屬其友朱熹贊之為作詞曰

以一身而備四氣之和以一心而涵千古之祕推其有
足以尊主而庇民出其餘足以範俗而垂世然而狀貌
不踰於中人衣冠不詭於流俗迎之而不見其來隨之
而莫睹其躅矧是丹青孰形心曲惟嘗見之者於此而
復見之焉則不但遺編之可續而已也

陳明仲畫象贊

故候官大夫陳君明仲之象友人朱熹仲晦父贊之

曰

介然而不使人忌者其自持之謹溫然而不使人狎者其汎愛之和其仕也自詭以循良之最其學也自期以德行之科嗚呼孰謂其齋此志而中道以沒使吾老於其里而不得為東阡北陌之經過也耶

程正思畫象贊

程君正思畫象朱仲晦父作贊

嗚呼正思退然如不勝衣而自勝有以舉烏獲之任言
若不出諸口而衛道有以摧髡行之鋒俛焉日有孳孳
者吾方未見其止乃一朝而至此則天曷為而不假之
壽以成其終嗚呼此猶未足以見其七分之貌來者亦
姑以是而想象其遺風紹熙壬子重陽前一月書

月字
疑日

字之
誤

書畫象自警

從容乎禮法之場沈潛乎仁義之府是予蓋將有意焉

而力莫能與也佩先師之格言奉前烈之餘矩惟闇然而自修或庶幾乎斯語

聚星亭畫屏贊

并序

按世說陳太丘詣荀朗陵貧儉無僕役乃使元方將車季方持杖從後長文尚小載著車中

後漢書曰陳實字仲弓潁

川許人嘗為閭喜令遷太丘長修德清靜百姓以安後以黨人連及逮捕人多逃避求免實曰我不就獄衆無所恃乃請囚焉遇赦得出宦者張讓權傾天下父死歸葬潁川名士無往弔者而實獨弔焉後復誅黨人讓以實故多所全宥實在鄉閭平心率物或有爭訟輒求判正曉譬曲直退無怨者黨禁解累徵不

起年八十四卒謚曰文範先生又曰荀淑字季和潁川潁陰人也少有高行博學而不好章句州里稱其知人李固李膺皆師宗之舉賢良方正對策譏刺貴倖梁冀忌之出補朗陵侯相蒞事明理稱為神君棄官而歸閑居養志又曰陳紀字元方實長子也至德絕俗與實高名並著而弟諶字季方又配之每宰府辟召羔雁成羣世號三君百城皆
既至荀使叔慈應
圖畫紀子羣字長文為魏司空

門慈明行酒餘六龍下食文若亦小坐著膝前

荀淑有八

子儉緄靖燾注爽肅敷居西豪里縣令苑康曰昔高陽氏有才子八人遂署其里為高陽里時人號曰八龍靖字叔慈有至行不仕早卒號曰玄行先生與字慈明年十二通春秋論語潁川為之語曰荀氏八龍慈明無雙舉至孝拜郎中對策陳便宜數千言即棄官去後坐黨錮隱遁十餘年董卓用事徵拜司空爽

以卓思暴終危社稷多舉才畧之士與王允等密謀
討之未及而以病終後允乃竟誅卓緄子或字文若
少時父以畏禍為娶宦者唐衡女後從曹操以為
謀主比之子房及操將受九錫或諫止之遂為所害
或亦于時太史奏真人東行續晉陽秋曰陳仲弓從
作郁諸子姪造荀父子于時

德星聚太史奏考亭陳氏故有離榭名以聚星盖取
五百里賢人聚

續陽秋語中更廢壞近始作新適邇敞廬因得相其
後事既又為之本原事迹畫著屏上并為之贊以視
來者云

猗歟陳子神嶽鍾英文淵範懿道廣心平危孫汙隆卷

舒自我是曰庶幾無不可獻身安衆弔豎全邦炯然
方寸秋月寒江願言懷人曰我同志故朗陵君荀季和
氏連峯對起麗澤潛滋儉而不見有黷其思薄言造之
顧無僕役獨呼二兒駕予以出青芻黃犢布幃柴車策
紀前衛杖藜後趨所造伊何高陽之里維時荀君聞至
而喜顧謂汝靖往應于門七龍矯矯布席開尊靖肅而
前翁拜其辱何悟斯晨得見清穆命爽行觴旅饋次陳
獻酬交錯禮度情親載笑載言因非德義益邁乃猷以

輔斯世髣髴兩稚亦著膝前原深本固莫出匪賢維此
慈明特謝儔匹晚際國屯敢憚濡迹贅旒之命恃以少
延邦朋之最孰與為先郁乃附曹羣亦忘漢嗣守之難
古今共歎崇臺回極于以占天猶曰茲野德星萃焉我
寓有亭舊蒙斯號今刺前聞象儀以告高山景行好德
所同課忠責孝獨慙余衷百爾窺臨竟考毋怠死國承
家永奉明戒

南康軍到任謝表

臣熹言伏奉勅命差臣權發遣南康軍尋具辭免奉聖
旨不允辭免令疾速前去之任候任滿前來奏事臣已
於淳熙六年三月三十日到任交割職事訖者迂愚無
用久陪香火之班臨照不遺驟假兵民之寄懇辭弗獲
宣布云初感極涕零愧深汗洽中謝伏念臣受材凡近
賦性顛蒙徒能讀古人之書夫豈識當世之務頃蒙登
進獲奉清閒繼遠迹於丘樊遂閱歲華之久顧馳心於
魏闕敢忘葵藿之誠中兩奉於除書亦屢祇於名節銜

哀抱病既莫效於驅馳假寵疏榮反繆膺於眷獎方誓
堅於素守庶少答於殊知豈意因仍復階任使論資校
考既已極於超踰揣分量能懼愈難於稱塞矧自垂於
夙志又仰負於前恩雖嘗控漑而莫回終坐懦弱之無
守遂扶衰朽暫別故山已見吏民具宣德意豈曰昨非
而今是實繇義重而身輕此蓋伏遇皇帝陛下性得堯
仁道高舜哲念安民之不易故慮尤軫於遠方謂知人
為甚難故用或收於棄物致茲孱瑣亦備使令臣敢不

仰奉詔條俯詢民瘼儻粗間於疾疚詎辭撫字之勞冀少假於旬時卒上退藏之請尚全末路克對寵光

浙東提舉到任謝表

宣教郎直祕閣提舉兩浙東路常平茶鹽公事臣朱熹上表臣言準告授臣前件差遣填見闕臣已於今月六日就本路蕭山縣交割職事訖者擢於偏壘付以外臺便道造朝單車詣部延見父老問其疾苦之因宣布詔書諭以丁寧之意榮踰望表懼溢情涯

中謝

伏念臣生

長田間棲遲林壑居然朴拙見謂迂踈潛心竊慕於師
承行已敢干於義命會逢聖旦參預時流驟自草萊起
分符竹乾坤大德施且不賞螻蟻私情報於何所屬歎
歲民無艱食謂愚臣職有微勞寵之冊府之華畀以近
畿之節雖駕馬之十駕後者鞭之然鼯鼠之五窮技止
此耳毋乃累公朝之選重以為多士之羞茲蓋恭遇皇
帝陛下闢舜四門馭周八柄欲尺寸之長並用致孱微
之品亦收比奉對揚親叨臨遣大明委照不棄負薪之

言零露疏恩更下賜緡之令顧憂所在稱塞為難臣惟
當恪意講求因時施舍不能則止戒小關之闕
當官
而行慕古人之報國庶殫毫末上答丘山臣無任

謝依所乞仍舊直寶文閣及賜詔書獎諭表

臣熹言臣昨具狀辭免新除祕閣修撰恩命近準尚書
省劄子奉聖旨依所乞仍舊直寶文閣仍賜臣詔書一
道特加獎諭者白記上聞幸曲全於愚守壘封下逮庸
特示於異恩祇服以還戰兢無已
中謝伏念臣學雖違

俗意敢近名徒以迂踈蚤絕榮途之望乃遭神聖晚深
國士之知中少效於驅馳竟靡聞於報稱及奉金華之
召寧忘丹宸之忠顧惟塵腐之淺聞莫副緝熙之隆指
逮復退閑之秩仍升論譔之華寵雖荷於殊常義終慚
於非據故上聖方臨於宸極而微臣屢觸於天威自度
孤危豈勝糜滅敢意出綸之渥有嘉陳義之明幸引分
之少安愧叨榮之愈甚茲蓋伏遇皇帝陛下重明必照
大度并容謂臣粗業詩書諒亦有聞於古義憐臣稍知

庶幾有極之歸臣無任
庶恥欲其無負於初心特屈憲章過形褒勸臣敢不服
膺至教邁迹前修不忝不求何止終身之誦是夔是訓

漳州到任謝表

朝散郎直寶文閣權發遣漳州軍州事朱熹上表臣熹
言準勅差前件差遣已於四月二十四日到任訖抱病
支離莫副光華之遣封章懇切更叨選用之良引避弗
回兢惶失次即強扶於枯朽已親見於耄倪仰戴恩威

俯深感懼

中謝

伏念臣蚤由場屋獲廁縉紳惟自信其

迂愚故絕希於榮進中荷壽皇之深眷屢嘗收用而終
許退藏晚逢嗣聖之誤知亦既閔勞而復加任使凡此
兩朝之殊遇豈伊一介之能堪矧漳浦之名邦實甌閩
之絕徼青衫捧檄昔嘗粗習其土風白首分符今庶少
安於毗俗靜揣不才之分極知為幸之多此蓋伏遇皇
帝陛下近法舜功遠循堯道九德咸事尚憂片善之或
遺四方無虞猶軫一夫之不獲肆曲收於棄物俾加惠

於遠黎臣敢不深體皇仁廣詢民瘼筋骸可勉豈忘盡瘁之勤疾疢或加未免告歸之瀆尚繫覆燾卒遂生成臣無任

除祕閣修撰謝表

朝散郎新授祕閣修撰主管南京鴻慶宮臣朱熹上表
言準告授前件職事臣再具辭免奉聖旨論讓之職以
寵名儒依已降指揮不許辭免臣已於八月二十三日
望闕謝恩祇受訖者愚誠屢黷初必冀於矜從成命莫

回反重勤於褒借叨踰已甚俯僂何容中謝伏念臣賦
質甚迂遭時獨異頃罷外臺之使薦陞內閣之華至於
論撰之除尤荷聖神之眷顧無名而有愧遂瀝悃以祈
哀本謂壽皇知遇之深當卒全其素守敢意睿王清明
之始即洞鑒其丹衷逮茲因事以求閑重以牧民之無
狀乃追黜幽之典復加申命之恩危悃再殫俞音終閱
更諭崇儒之意俾知假寵之由仰隆指之若斯豈固辭
之敢必措躬無所引分弗遑此蓋伏遇皇帝陛下盛德

日新至仁天覆欲風勵於四方之士誤用獎於一介之
臣臣敢不祇服訓詞恪思職業對揚休命惟慚薄技之
無堪敷暢遺經尚冀方來之有補以茲塵瀆少答生成
瞻望闕廷臣無任

潭州到任謝表

朝散郎秘閣修撰權發遣潭州軍州事主管湖南安撫
司公事臣朱熹上表言臣昨準告命差臣前件差遣已
於五月初五日交割職事訖者衰病卧家不堪驅使誤

恩分閭重玷選掄雖屢控於懇辭顧曲勤於褒諭寵榮
實異感懼難勝亟扶曳以就塗已支持而視事中謝伏
念臣迂疎末學災患餘生得陪香火之班豈復冠紳之
念海瀕牧養尚愧彊顏嶺表蕃宣幸蒙反汗豈期巨屏
游拜明綸昔獨避禮樂之華今專辱詩書之試况學兼
嶽麓修明遠自於前賢而壤帶洞庭拊近煩於元老
俾承二任孰稱萬分豈惟冒辭遠就近之嫌抑恐為知
人安民之累雖欲量能而易地自知無力以回天勉見

吏民具宣威德茲蓋伏遇皇帝陛下文明出治仁孝保
邦謂臣有討古之勤以臣懷澤物之志假之師帥之職
責以治教之功臣敢不仰佩訓詞俯殫學力雖馳驅靡
及唯知趨事之誠或黽勉不前願遂歸田之請預陳悃
悃終望矜憐

謝除待制侍講修撰實錄表

臣熹言伏奉告命授臣煥章閣待制侍講又準勅差兼
實錄院同修撰者分閩南州愧茂一毫之補論經內閣

恍驚二命之頒畀史職以仍兼戴上恩而愈重藏逃莫

避跼躄靡容

中謝

竊以王求多聞是惟建事帝入西學

于以上賢當始初清明之朝資朝夕論思之助作於心
而闕政事必救其原修其身以及國家要知所本非精
誠之有格何論說之足云視孟軻之敬王始不負聖人
之學為張禹之持祿殆將貽天下之憂况薦紳之所難
又載筆之為重顧頭白汗青之可誚豈槁項黃馘之能
為念昔先臣嘗掌茲事正熙寧元豐之殺舛嚴於朱墨

之分辨元祐紹聖之譏誣炳若丹青之著苟無家業曷
踐世官惜而居之吁亦危矣伏念臣見聞甚狹才識非
長開七袞之殘年荷三朝之異眷頃叨崇政之選嘗獲
遂於終辭茲玷邇英之聯覲莫從於素守此蓋伏遇皇
帝陛下言稽往訓動法成謨以緝熙光明之美而佛時
仔肩以剛健篤實之資而日新其德念遺大投艱之託
推好善忘勢之勤借是孤蹤聿來多士講魯論一簞之
義敢竊企於師傳誦楚史八索之文庶無忘於規益臣

無任感天荷聖激切屏營之至

辭免待制仍舊充秘閣修撰提舉南京鴻慶宮

謝表

臣熹言伏蒙聖恩以臣累奏辭免煥章閣待制特降睿
旨依臣所乞仍舊充秘閣修撰提舉南京鴻慶宮者假
寵過優居速冒榮之愧封章屢却退深留令之虞敢謂
天慈訖從人欲恩隆莫報感極何言中謝伏念臣早以
迂儒濫塵官簿晚逢興運誤簡淵衷首頒名節之光華

促侍經帷之清燕趨廂侍對復過借於龍光挾策陳詞
竟何裨於帝學旋奉閔勞之詔適諧退處之私雖竊便
安甫深依戀第顧山林之遠迹難通禁闈之近班亟冒
威顏薦輸卑悃幸所陳之大義已孚於未拜之前故引
避之微誠得遂於終辭之後然匪聖神之洞照敢期考
陋之曲全而况內閣簡編未贊兩朝之深眷舊邦香火
有嚴四聖之真游足安垂盡之期允謂非常之遇此蓋
伏遇皇帝陛下仁涵萬有德奉三無謂臣於勸講之功

雖無所就察臣所懇辭之意悉出於誠特畀俞音使償
本願臣敢不益堅素守仰稱鴻施景雖迫於桑榆力難
報國身未填於溝壑詎敢忘君臣無任

落職罷官祠謝表

臣熹言臣前任祕閣修撰提舉南京鴻慶宮今年五月
十三日已該滿罷至二十七日伏準尚書省慶元二年
十二月劄子節文臣寮論臣罪惡乞賜審斷褫職罷祠
奉聖旨依臣已於當日謝恩祇受訖者罪多擢髮分甘

兩觀之誅量極包荒姑示片言之貶逮復尋於白簡始
知麗於丹書鐫延閣論謨之名輟真祠香火之奉茲為
輕典允賴洪私捧戴奚勝感戴曷喻中謝伏念臣草茅
賤品江海孤生蚤值明時已誤三朝之眷獎晚逢興運
復叨上聖之深知名自藩維擢參帷幄畧無可紀足稱
所蒙暨遠去於朝行即永歸於農畝然猶賦之秩祿使
庇身於卜祝之間實在清流容厠迹於圖書之府所宜
恭恪或追悔尤乃弗謹於彝章致自投於寬網果煩臺

劾盡發陰私上瀆宸嚴交駭聞聽凡厥大譴大訶之目
已皆不忠不孝之科至於衆惡之交歸亦乃羣情之共
棄而臣憤眊初罔聞知及此省循甫深疑懼豈謂乾坤
之造獨回日月之光畧首從之常規既俾但書於薄罰
稽青終之明訓儻許卒遂其餘生是宜哀涕之易零已
覺大恩之難報此蓋伏遇皇帝陛下堯仁廣覆舜哲周
知謂表正於萬邦已極忠邪之判則曲全於一物未傷
黜陟之公遂使冥頑獲逃竄殛臣敢不涵濡聖澤刻厲

愚衷雖補過以修身無及桑榆之暮景然在家而憂國
未忘葵藿之初心瞻望闕廷臣無任

落秘閣修撰依前官謝表

臣熹言臣昨於慶元三年正月二十七日準尚書省劄
子節文臣寮奏臣罪惡乞與褫職罷祠奉聖旨依劄臣
照會臣即於當日望闕謝恩解罷職名仍奉表稱謝去
訖今於闕月闕日復準都進奏院遞到闕月闕日
告命一道付臣落秘閣修撰依前官者彈文上徹已幸

免於嚴誅詔墨下頒復寵加於明訓閱時既久祇命惟

新感極涕零懼深首隕

中謝

伏念臣草茅賤士章句腐

儒惟知偽學之傳豈適明時之用頃叨任使已屢奏於
罔功旋即便安復未能於寡過致煩重劾盡倚宿愆謂
其習魔外之妖言履市廛之汙行有母而嘗小人之食
可驗恩衰為臣而高不事之心足明禮闕以至私故人
之財而納其尼女規學宮之地而改為僧坊諒皆考覈
以非誣政使竄投而奚憾不虞恩貸乃誤保全第令少

避於清班尚許仍居於散秩勅璽書之來下恍歲律之
還周視要囚詎止於旬時蓋有遷就逮數惡難從於末
減猶聽省循口誦以還心銘敢墜此蓋伏遇皇帝陛下
仁兼覆載明極照臨作福作威總大權而在己曰賢曰
佞付公論於得人謂刑罰固足以懲姦而播告豈容於
匿指式敷顯號徧警具寮臣敢不深省昨非細尋今是
年齡晚晚雖悲後效之無期肝膽輪困尚喜孤忠之有
在誓堅死守覲答生成

致仕謝表

臣熹言四月二十三日準尚書省遞到勅牒一道伏奉
聖旨宜守本官致仕臣已於當日望闕謝恩訖者投閑
置散方疑宿負之未償引戶校年忽慶湛恩之純被適
符忱請遂沐殊私揖杖知榮戀軒增慨

中謝

伏念臣聖

朝賤士幽谷鄙生自審凡材每抱遺經而永歎人嗤僻
學雖逢盛旦以何施乃誤選掄過叨任使然計出藩而
入侍善無毫髮之稱獨聞倡偽以黨姦罪有丘山之積

果煩清議卒抵大訶幸夙簡於皇明得下從於輕典跡已安於吐里祿猶寄於朝班出入三年未能寡過周旋再赦亦既蒙恩乞臻告老之期亟決歸田之計尚意拘縻於謫籍豈容遂休佚之懷暨聞播告於臺評方喜有允俞之望本原所自會幸何多此蓋伏遇皇帝陛下神聖自天文明周物當彼忠佞交拏之際既皆判別而不疑逮其精華欲竭之時壹與休息而無間智仁兼盡威德並流豈但一夫獨為私幸臣敢不仰陶至化俯遂餘

年廣履細旃雖已絕雲天之望東阡北陌尚難忘畎畝
之忠生復何為死而後已

一云仰潛至教益厲初心懍歲月之無多雖已不堪
於把玩悵淵冰之未免獨何敢怠於戰兢誓畢餘生
仰酬大化

天申節賀表

黃屋非心茂對重明之運玉卮為壽聿臨載育之辰慶
洽中天驩騰廣域中謝恭惟尊號至仁被世盛德在躬

立聖政九百五條行堯之道履帝位三十六載薦舜於
天得聖人時心至愉而形至佚為天子父貴無敵而富
無倫既申命之用休宜降年之有永臣欽逢盛旦假守
偏城即雲氣而望蓬萊阻陪拜手觀泰元之授神策徒
切傾心

會慶節賀表

盛德當陽光啓重熙之運羣心就日樂推歸美之誠有
開繞電之祥敢罄祈年之禱中賀恭惟陛下慶流有行

德合無疆膺歷數以在躬垂衣裳而致治接黃帝推箕
迎日之統以莫不增過周家定鼎卜年之期自今其始
臣承流支郡幸際昌辰鼇抃千官班阻趨於文石嵩呼
萬歲祝啟後於華封

天申節功德疏

式逢舜旦慶龍樓虹渚之祥仰祝堯年假玉籍金輪之
教大啓天人之會少伸臣子之心尊號伏願注南斗之
長生等西方之無量上千萬歲壽阻趨文石之班同億

兆人心願效華封之祝

會慶節功德疏

聰明作元后式開長發之祥黎獻惟帝臣願上無疆之
頌欽崇殊庸假勝緣恭願陛下日月照臨乾坤廣大
仰瞻魏闕莫陪虎拜之班願比華封請祝虹流之祉

祈雨疏

丁壯在田厲農功之既作陰雲布野閔時雨之尚愆由
拙政之不修顧疲民而何罪肆陳丹悃仰籲蒼穹伏願

鼓以雷霆亟霈為霖之施澤及牛馬併銷連死之憂瞻
仰歸誠吁嗟請命

卧龍潭送水文

往分靈液來即祠壇誠未格於幽潛澤尚愆於田畝惟
時淹久懼弗吉蠲敢奉冰壺言歸貝闕別禱餘潤用弭
炎氛尚神聽之淵冲鑒微衷而響答

與江東張憲啓

頃奉誤恩特令試郡屢陳危悃未許投閒懼留命以干

誅已誦辰而就道伏念熹器非適用才不逮人粵自壯
年薦罹災患暨茲晚景益就衰頽逝將屏迹於荒寒敢
復萌心於仕進屬九重之過聽恥一士之遐遺曲賜甄
收載加湔拂遂從祠館畀以郡章倦鳥依林久絕高飛
之意潛魚在沼但知深入之安而况恩既厚則其責為
甚深力不能則雖勞而無補遂竊祈於罷免卒無幸於
矜從輿病以來彊顏特甚近瞻斧綉益愧冠紳恭惟德
厚望隆材宏用博適布宣於使指已明謹於邦刑激濁

揚清吏咸思於稱職持平履正人自以為不寬矧是衰
遲獲依庇冒載尋曩昔幸際光儀斂板趨庭茲不特少
伸下吏之敬奉命承教殆有以深慰積年之思春令向
深嘉生咸遂冀茂經於福履以前對於龍光頌願唯深
敷宣莫既

與葉提刑啓

術畧精明材猷敏贍頃屢將於使指茲復謹於邦刑深
窮法令之原吏無以肆茂著平反之績人用不寬顧此

妄庸將依庇冒修容以進即伸巡屬之恭奉教於前預
切簡書之畏春和在序淑氣方升惟加厚於保綏用對
揚於休渥傾瞻之悃頌述奚殫

與姚提點啓

學貫古今材周鉅細茲暫勞於節傳起盡護於東南子
母相權已懋無窮之計君民兩足更宏可大之規顧此
妄庸將依庇冒修容以進

同上

回寄居趙將仕啓

熟聞英譽有日于茲忽奉珍函為禮特厚啓緘疾讀荷
意難忘伏惟玉葉傳芳璇源孕秀謙恭克守綽有老成
之風問學自將盡脫豪華之習宗盟推重公聽益孚會
看發軔之初即快亨塗之騁喜屬叨誤寵驟畀左符方
斯引分以投閑未敢修書而見意豈圖先辱良用厚顏
眷然息偃之安庶幾得請邈矣披承之願徒切馳情

回楊通判啓

稔聞高誼雖識面之未諧遽辱珍函仰撫謙之特厚拜

嘉寵甚荷意難忘恭惟識量淵深器資宏博盤根錯節
知剗割之無難茂實英聲蓋蜚騰而甚久頃任監州之
寄已聞奏課之優豈容堅卧於鄉閭會見橫翔於禁闥
熹屬叨誤寵驟畀左符方斯引分以投閑未敢修書而
見意豈圖先辱良用厚顏眷然田里之安庶幾得請邈
矣門牆之隔徒切馳情

回曹職官啓

分符假守深懷躡次之慙抗疏投閑久露由衷之請誤

英僚之雅眷辱華問以為榮伏惟材識通時器資宏博
裁煩剝劇曾無盤錯之難約已奉公克有廉勤之譽會
聞交薦即見橫翔熹久與世疎難堪吏役儻資忠益或
免悔尤悵疾病之有加不任牽勉念合并之無日祇益
傾馳

回教授啓

學術深淳行能端直辟雍受業久聞多士之推先泮水
橫經復見諸生之承式英聲日茂異數鼎來熹久與世

疎
上同

回都昌知縣啓

分符假守深懷躡次之慙抗疏投閑久露由衷之請誤
英僚之雅眷辱華問以為榮伏惟某官器宇宏深才猷
敏邵銅章墨綬煩暫試於鳴弦錯節盤根顧何勞於遊
刃會聞課最別奉詔除熹久與世疎難堪吏役儻階聯
事庶獲蒙成悵病疾之有加不任牽勉念合并之無日
祇益傾馳

與正言啓

懇辭使節敢擇地以求安申畀郡符忽自天而疏寵凜
難回於上命耿莫遂於初心以數年疾病之餘任千里
撫摩之寄雖加強勉尤切凌兢伏念熹林壑閑蹤布韋
故習少而慕古師出處於前修介不通今恥浮沈於流
俗曩荷聖神之眷屢加選用之榮當官而行蓋圖報上
知難則止匪欲為高既疾疢之交攻且形神之俱耗久
便田廬之偃伏詎堪原隰之驅馳辭尊居卑豈為貧而

猶仕投閑置散或揣分之誠宜敢期宸渥之過優復使
侯藩之假守意昔時之游宦固嘗習熟於鄰封謂晚歲
之衰殘尚可從容於道院然比年之非舊由積弊之相
仍財賦既促而費用寢浮田產不均而姦欺滋出要必
更張而乃善恐非卧治之能勝深虞五枝之窮仰負九
重之託伏惟正言大明國論力振朝綱心正意誠蓋得
本原之學諫行言聽汙臻膏澤之流每於獻納之雍容
尤務推揚於踈逖肆如枯朽誤玷承宣二千石之第循

良已預慙於共理八十日而賦歸去初何俟於終更悃
幅之私剡摩罔既

謝政府啓

漳州解
罷得祠

迫憂患以求閑方陳危懇即便安而誤寵并沐殊私弗
遂懇辭迄成忝冒伏念熹學惟信已材不逮人生際休
明豈自甘於淪棄病侵遲暮久莫奉於驅馳比叨民社
之臨猶冀桑榆之効屬私門之變故致公務之弛隳龜
俛旬時已積簡書之畏顧瞻疇昔未忘香火之修仰洪

造之不違服明恩而已厚敢意便蕃之錫更陞論譔之
華顧壽皇特達之深知昔幸容其遜避而聖上丁寧之
申命令復軫於眷懷惟拜賜之無名屢騰章而自列重
煩睿旨曲借寵光仰戴皇慈欲終辭而不敢自憐末路
知仰報之難圖祇命以還措躬無所茲蓋伏遇丞相國
公妙熙天緯獨運化鈞樞使相公力扶皇極獨運鴻樞
參政同知相公夙推衆望久贊
化鈞欲儲材於朽鈍之餘肯垂意於事功之外遂令衰晚
有此叨踰喜敢不思稱榮名勉終素業考諸前聖倘不

謬於正傳覺彼後知或少裨於大化過此以往未知所
裁

答辛幼安啓

光奉宸綸起持憲節昔愚民犯法既申震讟之威今聖
上選賢更作全安之計先聲攸暨慶譽交興伏惟某官
卓犖竒材疏通遠識經綸事業有股肱王室之心游戲
文章亦膾炙士林之口輶車每出必著能名制閭一臨
便收顯績茲久真庭之逸爰深正宁之思當季康患盜

之時豈張敞處閒之日果致眷渥特畀重權歌皇華之
詩既諭示君臣之好稱直指之使想潛消郡國之姦第
恐賜環不容暖席熹苟安祠祿獲託部封屬聞斧繡之
來嘗致鼎裊之問尚煩縟禮過委駢緘雖雙南金恐未
酬於鄭重况一本薤亦奚助於高明但晤對之有期為
感欣而無已

還鄉謝人惠書啓

遠勤車蓋已欣獲奉於清標寵被函書復喜與聞於雅

趣第慙衰陋莫稱揄揚雖請誦其所聞蓋嘗自竭尚敬
修其可願式副深期過是以還未知所報

謝人投生日詩啓

年及無聞已負蓬弧之志日臨初度復增莪蔚之悲誤
辱謙光俯加賁飾顧茲衰朽雖黼黻以何施仰歎瑰竒
用襲歲而為好

回謝解啓

待問澤宮登名天府方幸究宣於明詔敢期誤枉於華

牋披味以還感歲難喻解元先輩學高庠序行著州閭
疇昔旦評已推高於前列厥今歲舉反見屈於後來顧
輿議之弗平宜壯圖之未快然察四端之固有第聞辭
遜之心旋觀三揖之彌文蓋敦廉退之節矧是專經之
舊豈忘立教之端諒考聖言益恢賢業抹洄斷斷之
弊尚及此時致唐虞濟濟之和更期異日

回黃氏定書

樞衣問政夙仰吏師之賢受幣結婚茲喜德門之舊遠

承嘉命良慰鄙懷令兄察院位第四令姪直卿宣教厲志為儒久知為己熹第二女子服勤女事殊不逮人雖貪同氣之求實重量材之愧於異日執笄以見倘免非儀則他年覆瓿之傳庶無墜失此為忻幸曷可喻云

回范氏定書

兩翁抗議已偕許國之忠再世聯姻遂忝通家之好及茲幸會夫豈偶然伏承某人詩禮有聞方謹好逑之擇而熹女德容未習亦期吉士之歸誤煩匪芥之求遽委

儷皮之聘欽承嘉命實重永懷雖唐虞世祿之榮莫容攀附然鴻耀素風之懿或可庶幾欣荷之私敷陳因既

回周氏定書

里閭追逐久欽臭味之同媒妁往來遂講婚姻之好靜言衰落敢意扳聯茲承令弟府判以第二令姪先輩詩禮早聞不輕授室謂熹長男房下長孫女組紉粗習亦欲有家飾禮幣以見臨枉函書而甚寵老懷易感適增舐犢之悲之子于歸倘遂乘龍之喜其為慰幸豈易名

言

同安縣學經史閣上梁文

兒郎偉大同古地駱粵名邦間出巨人鼎在公卿之位
亦多賢士鬱為閭里之師雖山川之炳靈迺教化之純
被比罹屯難益復澆漓學校荒涼久風猷之不競圖書
散脫闋絃誦以無聲詔令壅而弗宣父兄以為大戚顧
惟竊食敢不究心是以申諭諸生俾沈潛於訓義力裒
衆記務廣博其見聞幸大府之哀憐總羣書而推予惟

上賢篤意於教誘使邑子蒙幸於作成爰即學宮創為
傑閣庶緘滕之慎固絕蟲鼠之覬覦既畫諾於縣庭旋
受金於省戶西曹藉力羣彥併心而吏惰不供幾若道
旁之室顧人疲久役將起澤門之謳迨程事之既嚴始
掄材而甫就俾功見效獻室有期不惟士得讀未見之
書人知自勵且使書得為無窮之利計以永存聊出詞
章用升梁欂想均童耄共此歡呼

兒郎偉拋梁東曉日曛曛出海紅照見黌堂通複閣層

夢如畫插晴空

兒郎偉拋梁西
春草秋雲極望低
文圃山高君莫羨
聖門巖嶮與天齊

兒郎偉拋梁南
滄溟無際水天涵
蕩瀾魚龍君莫畏
淵源學海更潭潭

兒郎偉拋梁北
錯落衆星高拱極
昭回運轉君莫疑
燦爛光明在方冊

兒郎偉拋梁上
聖朝碩輔蘇丞相
魯無君子定虛言
猶

是諸生丈人行

兒郎偉拋梁下人老遺書追董賈諸生勉繼舊王貢時
泰不憂身在野

伏願上梁之後士無廢業家有傳書究述作之原遂見
古人之大體際功名之會起為當世之儒宗惟不悖其
所聞乃式符於深望

晦庵集卷八十五

欽定四庫全書

集部

晦庵集卷八十六

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣葉蘭

謄錄監生臣王廷璧

欽定四庫全書

晦庵集卷八十六

宋 朱子 撰

祝文

行鄉飲酒禮告先聖文

一昨朝廷舉行鄉飲酒之禮而縣之有司奉行不謹容
節謬亂儀矩闕踈甚不足以稱明天子舉遺興禮之意
今者賓興有日喜謹與諸生考協禮文推闡聖制周旋
揖遜一如舊章即事之初敢以舍菜之禮謹修虔告

經史閣上梁告先聖文

書樓之役工告僞功虔舉修梁卜日惟謹敢以釋菜之禮告於先聖先師至聖文宣王惟先聖先師啟迪衆志畀以有成謹告

告護學祠文

書樓之役工告僞功虔舉修梁卜日惟謹是用告於爾神惟爾有神尚祐衆心以相茲事

奉安蘇丞相祠告先聖文

故相蘇公頌南安人也其道學淵深履行純固天下學士大夫之所宗仰而邑子後生聞見單淺弗克究知父兄閔焉用告有司請即學宮歲時奉祠以建遺烈使學者有所興起今畢事將妥厥靈敢以舍菜之禮告於先聖先師之神謹告

屏弟子員告先聖文

熹不肖昨以布衣諸生推擇為此縣吏而得參聽其學事而行能寡薄治教不孚所領弟子員有某某者乃為

淫慝之行以溷有司熹竊自惟身不行道無以率勵其人使至於此又不能蚤正刑辟以彈治之則是德刑兩弛而士之不率者終無禁也是故告於先聖先師請正學則恥以明刑夫扑作教刑而二物以收其威固先聖先師學校之政所以遺後世法也唯先聖先師臨之在上熹敢不拜手稽首

奉安蘇丞相祠文

衆人衣冠之盛自國初以至於今其間顯人或至公卿

者多矣然而終始大節可考而知則未有若公之盛者也惟公著節於熙寧登庸於元祐而幅巾謝事偃仰婆娑於紹聖元符之間然則公之所自任於進退出處之間者可謂無所苟矣是蓋將比古之所謂大臣者豈獨泉人數公而已哉今以邑人之意祠公於學即事之始敢布其衷尚饗

奉安蘇丞相畫像文

惟公始終一節出入五朝高風聳乎士林盛烈銘於勳

府矧茲故邑實仰餘光悵親炙之無從冀瞻依之有地
是用肖德儀於廟院建遺烈於學宮營表方將儀圖聿
至式瞻精宇爰寓神棲既協吉於靈辰敢式陳於菲薦
尚饗

準赦謁諸廟文

天子郊見上帝釐事告成還御路門班祭澤於海內以
爾神有功於民載在祀典申詔有司以禮報祭臣某不
佞奉承明詔敢不奉制幣潔犧牲駿奔走以告祠下惟

爾有神尚克膺天子丕顯休命尚饗

請雨謁北山神文

乃者邑民以歲事有謁於君侯君侯過恩賜之吉卜而許以來是故將有以鎮撫綏寧之也民其敢不懽欣舞歌以樂神賜吏其敢不潔齊芬苾以拜神休惟風雨水旱癘疫之不時以君侯之不顯威神是震是祓俾無災害則豈惟斯人專美其賜吏亦與免於曠弛之憂惟君侯之留意焉

春祈謁廟文

間者歲比不登民填溝壑今幸改歲人得以修其畝
農桑之務惟是雨暘以時俾無水旱螟螣之災則非人
力之所能及惟君侯加惠之則幸矣某祇承祀典敢不
齋肅明薦以獻以祈

秋賽謁廟文

今茲薦罹水旱之數宜不得下熟然頗有所收足以慰
夫三農之心而供有司之賦者實神有以祐之也不然

民饑而死吏之憂豈有所極哉仲冬之月祇循故事以告謝神不敢愛其潔牲醴酒惟不足以答神之賜而豈敢有所祈

辭先聖文

熹祇服厥事於茲五年業荒行隳過咎日積雖追厥罰曷慊於心辭吏告歸愧仰崇仞謹告

南康謁先聖文

熹蚤以諸生推擇為吏中遭疾病即退丘園乃得其耕

耨之餘日伏讀先聖先師之遺書夜思晝行不敢以昧
陋自棄者二十餘年於此矣誤蒙聖恩假守茲郡懇辭
不獲輿曳而來疇昔所聞庶幾小試而蒲柳之質衰不
待年憤耗支離已深不夢之歎大懼弗稱以辱君師祇
事之初敢以誠告惟先聖先師之靈實誘其衷使幸不
獲罪於其民而蚤遂歸田以終故業則熹不勝幸甚謹
告

白鹿洞成告先聖文

維淳熙七年歲次庚子三月癸丑朔十八日庚午具位
敢昭告於先聖至聖文宣王熹昨按國朝故事及郡圖
經得白鹿洞之遺址於城東北十五里蓋唐李渤之隱
居江南李氏因以為國學及我太宗皇帝又嘗賜之書
史以幸教其學者而淪壞日久莽為丘墟因竊為念幸
以諸生得奉詔條顛以布宣教化為職顧弗此圖懼速
譴戾乃議復立今幸訖功將率同志講學其間意庶幾
乎先聖先師之傳用以答揚太宗皇帝之光訓鼓篋之

始敢率賓佐合師生恭修釋菜之禮以見於先聖以先師究國公先師鄒國公配尚饗

白鹿洞成告先師文

熹仰稽國典建此學宮鼓篋之初恭修釋菜之禮惟公發揚聖蘊垂教無窮敢率故常式陳明薦從祀配神尚饗

鄒國公云惟公命世修業克紹聖傳

奉安濂溪先生祠文

惟先生道學淵懿得傳於天上繼孔顏下啓程氏使當
世學者得見聖賢千載之上如聞其聲如睹其容授受
服行措諸事業傳諸永久而不失其正其功烈之盛蓋
自孟氏以來未始有也熹欽誦遺編獲啓蒙吝茲焉試
郡又得嗣守條教於百有二十餘年之後是用式嚴貌
像作廟學宮并以明道先生程公伊川先生程公配神
從享惟先生之靈實臨鑒之謹告

謁故侍中太尉長沙陶威公祠文

惟公忠順勤勞機神明鑒沒而不朽食此江漬其亦有以相之使民安於下官給於上而熹也早得收其疾病之軀以幸免於婆娑之嘆則公之賜大矣款謁之初敢以誠告

謁李尚書劉屯田祠文

熹猥承人乏假守茲邦祇事之初以禮見於先聖先師而視其學則有公之遺祠在焉仰惟壯節高風夙所欽慕敢不再拜伏謁以致其高山景行之思惟公之靈尚

克臨鑒謹告

告熊孝子墓文

維淳熙六年歲次己亥五月戊午朔具位熹謹遣某致祭於唐故孝子宜春縣丞熊府君之墓熹叨被誤恩假守茲土視事之始考諸圖經以求此邦前賢潛德隱行之實於建昌得陳大中大夫從事中郎二司馬君以及府君之事蓋皆以孝德聞而府君精誠之感獨致涌水成川之應私心竊敬仰焉然按圖以求其故迹則二司

馬君之墓不可知而府君之墓宅學基猶有遺處謹命
有司依準赦令禁禦樵牧其唐朝旌表舊門亦已復請
於朝俟報修立而先遣僚吏敬以酒肴之奠昭告此誠
尚其英靈來鑒來享

祭屯田劉居士墓文

熹舊讀歐陽子廬山高之詩而仰公之名恨生遐僻不
得一來仰其山之高而拜公之墓也茲誤上恩畀以郡
紱至止之日望於四郊則山屹立千仞者故在而公之

華屋山丘零落殆盡幾無迹之可尋矣乃訪邦之耆老
俊彥得公之墓於城西荒郊廢圃之間其不為耕耨之
所及者蓋已無幾因復作為門垣而亭以表焉又得嘉
名於寓士之賢者書而揭之以見公志庶幾嗣而官於
是者有以謹其樵牧之禁東西行而過於是者有以興
起其剛毅廉退之心蓋不惟有以少慰夙昔鄉往之私
亦可以仰稱聖天子所以使之承流宣化之意也工告
訖役一奠致誠公而有靈庶其鑒饗謹告

奉安五賢祠文

熹誤膺朝命來守是邦至止之初得拜劉李二公之像於學欽聳高風考觀正論既有以慰夙心者既又咨訪得陶公栗里故居於郡境且知秘丞劉公蓋嘗祿於筦庫而忠肅陳公又嘗辱為遷民也永惟數公大節清名危言直道遺烈所在千載如生爰始爰謀合享斯室季月之吉神位告成敢合僚吏率諸生以禮告於祠下蘋藻在列誠意感通羣公有靈尚克歆顧

謁廟文

熹抱病田間不堪為吏久矣聖天子哀憐不忍終棄強
畀符竹使為此邦輿曳而來亦既視事以衰眊罷軟之
資當民貧財匱之際大懼曠闕無以克當明恩惟神受
職明廷以食茲土其與命吏憂責惟均其亦有以相之
使民安於下官給於上而熹也蚤得收其疾病之軀以
歸老故丘則神之賜大矣款謁之初敢以誠告他不敢
以有所祈謹告

謁社稷文

熹叨被恩除假守茲土載惟社稷民命所依祇率故常
按行封壇用嚴國典式對神休謹告

廣佑廟祈雨文

大王有功德於此土之人苟有雨暘之憂無不禱於大
王其禱之也則無不昭答如影響之隨至斯民之心歸
之如父母信之如蓍蔡者有年於此矣間者上天降災
陽愆陰伏嘉生百物不蒙滋潤熹等乃大速亂於厥禱

祠之事罔克專於大王懈惰弗虔咎由熹等而使千里之民田疇涸枯禾稼槁悴今其甚者有若燔灼矣雖並走羣望懇祈備至而雲氣將交旋即解駁焦然不能有膚寸之合秋陽益驕燥烈殊甚物之蒙害日以益深若自今以往三日不雨則千里之民所恃以為生者蕩析無餘而無以為食其老弱將轉乎溝壑而死少壯者將散而為賊盜以爭其旦夕之命其禍亂之至豈有所極哉夫今不揅三日之後大王雖顧而哀之不可拯已故

熹等私竊計議以為莫若奔走歸誠請命於大王之祠
下大王若哀其迫切赦其前愆有以惠綏之則三日之
內熹等齋宿以俟休命三日而不應則是大王終棄絕
之熹等退而恐懼以待誅殛不敢復進而禱矣恭惟大
王闔闢造化一雨之恩蓋其餘事誠有意哀此千里之
民則願無愛而亟為之熹等之願也拜伏於庭不勝哀
叩懇切之至謹告

廣佑廟謝雨文

天久不雨苗之秀而將實者秋陽暴之日以憔悴田將
無以為收人將無以為食大命近止罔或不憂我父子
兄弟是用夙夜不遑啓居更相告語奔走羅拜於祠之
庭而請命焉君王顧哀昭答如響禱之明日甘澤沛然
晝雨宵零越五六日而未艾崗陵漸潤草木蕃滋孰是
嘉生而不豐好德宏施普恩大澤深夫豈可以言報顧
無以自致其拳拳率脩故常祇薦蘋藻惟君王降佑歆
享則斯人之願也

豐利侯祈雨文

熹多病不才濫尸郡寄修政不德以干陰陽之和自秋以來天久不雨早稻雖已收成而晚田不免告病吁嗟之禱徧於羣望而嘉澤未應風日益高氣日益寒雲既合而復離禾既秀而不能有以實也朝兢夕惕不遑啓居惟侯聰明久食茲土雨暘之柄惟厥攸司日者雖已致祠懼或不能蠲潔以達誠意欲躬走謁又恨符印之守不克以前謹遣某官奔告祠下而熹祇率僚吏拜送

於門西望叩頭再拜以請惟侯哀矜賜之一雨以卒終
歲之惠則豈惟吏之不良獲免於戾而邦人父子實蒙
其休所以報事侯者其敢有懈也

祈雨文

間以旱災奉詔致禱閱月踰時雨不可得稻之早熟者
什失八九而吏之所以為禮樂與辭者亦既竭矣欲取
水湫淵罷祠祀而專力乎人事之備則又念夫稻有晚
出而未就者不能無冀幸於萬一於是感歎憤激不能

自已躬詣靈湫而冀於有神請復與神為三日之期以聽休命惟神受職帝庭降食茲土以福其人為事今人之急如此神若弗聞亦何神哉若三日不雨雨而不周且浹於四封惟天聰明吾恐神之不得安其室神尚聽之毋忽

秋報祝文

春禱秋報國有令典歲雖不登而有司不敢廢亦不敢以怠比者徧禱於神神非不加貺於民也直後時而蒙

休者淺爾爰陳嘉薦敬修常事神其顧歆益惠我民

祈晴文

東土之民薦罹水旱其幸免於溝壑者指二麥以救朝夕之急而又相與戮力事農以冀有秋其得失之筭死生係之非常歲比也乃今天雨不休湖水汎濫小麥之未收者亦既折腐不得以食而新苗未立水没其顛又將無復西成之望吏民憂懼術無所施惟神威靈作鎮茲土其必以顧而哀之汎掃浮陰錫以晴霽則神之惠

也民之幸也熹等濫將使指實分顧憂敢不齋祓再拜
以請惟神鑒之謹告

禹廟云王威神
在天降食茲土

謝晴文

乃者以水潦之災有禱於神蒙神之休開廓氛翳使麥
收稻植人得逭其溝壑之憂既有日矣熹等敢不躬拜
祠下跪薦牲酒以答靈貺惟神歆顧終此大恩賚以豐
年驅其厲鬼俾我民復得以遂其有生之樂則神之賜
於茲土為無窮其食於茲土為無愧

祈雨文

吏既不德無以媚於上下以召和氣而福斯人其所以
布主恩救民命者罔不惟神之依故熹往者嘗輒有請
於神而亦既受其賜矣然方是時霖潦之災獨環越百
里之間為然若今之旱則自浙河以東為州者七無不
告病捐瘠之民凜然日有狼顧之憂乃不齊被奔走以
告於神其將安所歸命敢叩祠庭頓顙屏息以俟嘉應
惟神幸哀憐之謹告

漳州謁先聖文

維紹興元年歲次庚戌四月甲申朔二十七日庚戌具位朱熹謹以清酌之奠敢昭告於先聖至聖文宣王熹總髮聞道白首無成茲荷誤恩復叨郡寄涖事之始載見祠廷永念平生恒焉內疚尚蘄啓佑俾度其心毋悖所聞以速大戾謹告

刊四經成告先聖文

敢昭告於先聖至聖文宣王先師兗國公先師鄒國公

熹恭惟六經大訓炳若日星垂世作程靡有終極不幸
前遭秦火煨燼之厄後罹漢儒穿鑿之謬不惟微詞與
旨莫得其傳至於篇帙之次亦復散亂遙遙千載莫覺
莫悟惟易一經或嘗正定而熹不敏又嘗考之書詩而
得其小序之失參稽本末皆有明驗私竊以為不當引
之以冠本經聖言之上是以不量鄙淺輒加緒正刊刻
布流以曉當世上以具告熹病卧不能拜起謹遣從事
敬奉其書以告於先聖先師之廷神靈如在尚鑒此心

式相其行萬世幸甚謹告

謁高東溪祠文

惟先生剛方之操鯁切之言一視險夷至死不變所謂
一世之偉人非獨一鄉之善士也熹敬仰高風為日既
久又幸嘗得執筆編列祠事而今日之來獲拜堂下則
於隱忍回互之譏若有愧焉炷香酌酒斂衽陳詞伏惟
先生之靈有以鑒之謹告

又謁高東溪祠文

謹以釋奠之明日致祭於東溪先生高公惟公志節堅
高議論英發不容何病至死弗渝顧我顓蒙舊勞嚮往
肇茲明薦庶激懦貪謹告

謁李龍學祠文

紹興之初公在邇列力闢和議見忌權臣出守此邦治
行亦著竟以讒口去郡卧家人懷其忠建此遺烈熹愚
不肖獲奉餘規永惟先人實同聲氣載瞻劔履感慨增
深敢薦馨香尚祈昭鑒謹告

謁三賢祠文

謹以釋奠之明日致祭於唐相國常公四門助教歐陽公高州刺史周公閩自唐世始有華風惟爾三賢實為首倡稱思未泯延及於茲報事之虔吏不敢廢謹告

謁端明侍郎蔡忠惠公祠文

惟公忠言惠政著自中朝筮仕之初嘗屈茲郡歲時雖久稱思未忘厥有遺祠英靈如在熹雖不敏實仰高風涖事之初敬修禮謁謹告

謁崔統領祠文

惟侯忠存報國勇不謀身厥有遺祠英靈如在我來伊
始稽率故常敢薦肴觴用伸悼歎謹告

謁諸廟文

國家受天明命奄有萬方分職任功幽顯無間熹奉制
勅來撫漳民永惟明靈實同憂寄涖事之始祇款卹祠
敢竭愚衷與神為誓修身奉法節用愛人熹雖至愚不
敢不勉毆除疫癘時節雨暘非人所能是乃神職吏有

不吏神得而誅神或不神則又奚咎有羞在列馨香發
聞惟神聰明鑒此心曲

謁社稷文

社稷之神實司民命故先王之法以民為貴社稷次之
而牧民者其重不得班焉肆我國家稽古立制使凡為
守令者始至則親謁於其祠所其所以愛民敬神之意
厚矣熹恭承聖詔來守此邦式舉舊章尚祈昭鑒謹告

準即位赦祭神文

新天子端命帝庭光臨大寶敷錫海內咸與惟新虔命
有司式稽舊典嶽祇川后若古帝王義士忠臣悉嚴祀
事庶臣分土職在布宣奉醪羞致祠下惟神鑒格歆此
德馨永佑我民以對休命

謁修道州三先生祠文

維紹熙五年歲次甲寅八月關日關謹關遣學生迪功

郎道州寧遠縣尉馮允中致祭於濂溪先生周公明道
先生程公伊川先生程公於皇道體沕穆無窮義農既

遠孔孟為宗秦漢以還名崇實否文字所傳糟粕而已
大賢起之千載一逢兩程之緒自我周翁清瀟之原有
嚴貌象欲覲無因徒有悵望吏以毀告閔然於衷出金
少府往佐其功爰俾諸生敬陳一酌先生臨之有赫無
昧尚饗

修三閭忠潔侯廟奉安祝文

惟神為國上謀遭讒放逐行吟憔悴厥有離騷懷沙自
沈勇赴茲水遺祠錫號帝有愍書吏情不供神用弗宇

乃今修奉亦既訖功敢饌靈神敢陳椒醕惟神降鑒永
奠厥居

滄洲精舍告先聖文

維紹熙五年歲次甲寅十有二月丁巳朔十有三日巳
已後學朱熹敢昭告於先聖至聖文宣王恭惟道統遠
自羲軒集厥大成允屬元聖述古垂訓萬世作程三千
其徒化若時雨維顏曾氏傳得其宗逮思及輿益以光
大自時厥後口耳失真千有餘年乃曰有繼周程授受

萬理一原曰邵曰張爰及司馬學雖殊轍道則同歸俾
我後人如夜復旦熹以凡陋少蒙義方中靡常師晚逢
有道載鑽載仰雖未有聞賴天之靈幸無失墜逮茲退
老同好鼎來落此一丘羣居伊始探原推本敢昧厥初
冀以告虔尚其昭格陟降庭止惠我光明傳之方來永
永無斁今以吉日謹率諸生恭修釋菜之禮以先師究
國公顏氏邨侯曾氏沂水侯孔氏鄒國公孟氏配濂溪
周先生明道程先生伊川程先生康節邵先生橫渠張

先生溫國司馬文正公延平李先生從祀尚饗

歸新安祭奠文

一去鄉井二十七年喬木興懷實勞夢想茲焉展掃悲
悼增深所願宗盟共加嚴護神靈安止餘慶下流凡在
雲初畢霑茲蔭酒肴之奠惟告其衷精爽如存尚祈鑒
享

又祭告遠祖墓文

維年月日遠孫熹謹率姪某姪孫某等以酒果告於遠

祖二十一公制置府君祖妣杜氏夫人之墓惟昔顯祖
作鎮茲邦開我後人載祀久遠封塋所寄奉守弗虔他
人有之莫克伸理茲用震懼籲於有司鄉評亦公遂復
其舊伐石崇土俾後弗迷即事之初敢謝其謹謹告

焚黃文

日者天子始見上帝於泰壇頌慶宇內凡有列於朝者
皆得追榮其先以廣孝治故我皇考班通九列而皇妣
號比郡封聖澤所加幽顯咸賴熹愚不肖久深不泊之

悲祗奉制書徒切哀隕謹以清酌時羞涓日以告伏惟
恩靈對此休命謹告

又焚黃文

日者天子始郊頒慶宇內熹以職秩得從大夫之後故
我亡室錫號有加恭奉制書俯仰悼歎惟爾有靈尚克
嘉之謹告

又焚黃文

新天子端命帝庭欽承天序敷錫有位咸得追榮其先

有司承詔遂以皇考贈中大夫之命來告於第慈顏永
隔餘五十年祇對寵光感涕何極謹因祭歲恭奉制書
拜手以告而熹不肖繼忝從班大饗之恩復膺錫命肆
我皇妣爰及故嬪亦得扳聯並受祭澤絲綸異數行即
薦陳尚期恩靈歆荷亡斃謹告

又焚黃文

恭惟先君天賦異質孝友之行足繼前修雅健之文追
古作者爵壽弗稱隕於半途施及後人叨被寵祿追榮

七命始列從班而先夫人亦膺顯號厚德之報不其在
茲並命帝庭璽封霞檢贊辭褒異視昔有加唯是音容
日荒日遠生我勞瘁追養靡從祇奉命書舍爵以告涕
泗摧咽不知所云尚饗

又焚黃文

君以辛亥郊恩始受大夫妻之號及今饗賚予忝近列
而君之號又躡進焉念昔相從惟艱惟悴君能勤力相
我實多豈意莫年寵榮狎至君之季子亦被賞延而君

不少須是可悲已奉奠致詔君其聽之尚饗

又焚黃文

熹賴遺訓竊位於朝獲被慶恩追榮禰廟亦有年矣比以鈎黨廢錮憂畏過深以故及今始克祇奉命書以告於寢廟惟我皇考洞視今古靡有遺情陟降如存尚克歆此丕顯休命顧熹衰頽年迫告休使我皇考未躋極品而先夫人亦未克正小君之號流根之報無復後期求念及茲痛恨何極仰惟慈蔭俯鑒愚衷尚啓後人不

日昌大熹瞻望恩靈不勝感慕推咽之至謹告

贈官告皇考文

往歲天子用事泰壇上帝降歆福祚昭答慶賜之澤覃
及萬方中外幽明罔不咸賴謂熹名秩有列內朝降以
命書賁其禰廟顧念孤藐祿不逮親祇奉明恩益深哀
慕茲用齋祓致告寢庭欽惟神靈服此休顯熹雖不肖
敢不敬恭惟孝惟忠無或荒墜嗣有褒賜尚克嘉之覆
其後人延於永世

第三男授官告家廟文

熹前任煥章閣待制該遇明堂大禮赦恩奏補第三男
在已蒙聖恩授承務郎祇承先訓蒙被賞延餘慶所覃
益深永慕

遷居告家廟文

熹罪戾不天幼失所怙祇奉遺訓往依諸劉卜葬卜居
亦既累歲時移事改存沒未安乃眷此鄉實亦皇考所
嘗愛賞而欲卜居之地今既定宅敢伸虔告以安祖考

之靈伏惟降鑒永奠厥居垂之子孫世萬無極

致仕告家廟文

維慶元五年歲次己未六月辛酉朔孝孫具位熹敢因
時享昭告於祖考之靈熹至愚不肖蒙被先世遺德獲
祇祀事五十餘年歲時戰兢罔敢怠忽至於今茲行年
七十衰病侵凌筋骸弛廢已蒙聖恩許令致事所有家
政當傳子孫而嗣子既亡藐孤孫鑑次當承緒但又年
幼未堪跪奠今已定議屬之奉祀而使二子埜在相與

佐之俟其成童加冠於首乃躬厥事異時朝廷察熹遺忠或有恩意亦令首及伏惟祖考擁佑顧歆永永七數熹不勝大願其諸家務亦當計度區處分屬埜等及諸孫息使有分職以守門戶尋別具告而施行之熹之衰病勢難支久如以恩靈尚延喘息之間猶當黽勉提總大綱不使荒頽以辱先訓伏惟祖考實鑒臨之謹告

告考妣文

孝子具位熹敢昭告於皇考太史吏部贈通議大夫府

君皇妣孺人贈碩人祝氏熹不孝孤露垂六十年不能以時考次先君行實以表於墓迹其所由雖實有待然而怠緩不虔罪已無所逃矣逮今晚暮衰病侵加改卜之謀始有定論乃克紬繹遺文傳之時事撰成行狀一通粗以發明先君立朝議論本末而皇妣德範梗概亦以附書將以請銘於故相退傅益國周公庶幾有以闡揚潛懿昭示後來使子子孫孫勸忠勉孝以無忘考妣啓佑丁寧垂裕永久之意繕寫既成先事以告惟是荒

塞之餘不無闕漏熹不勝悲切皇懼之至伏惟恩靈如在鑒此哀誠則熹不勝千萬幸甚謹告

時祭祝文

粵此季秋成物之始藐茲弱質維望以降

胡江切

永念劬

勞莫伸報効昊天罔極悲慕何窮謹以云云

歲祭祝文

氣序流易歲律將更追遠感時不勝永慕謹以潔牲剛鬣粢盛醴齊祗薦歲事以某人祔食尚享

祭土地文

敢昭告於土地之神仲秋之月萬寶將成蒙神之休幸
茲遣免式陳菲薦用以揭虔尚其顧歆永垂庇佑

又祭土地文

熹窮年奔走茲復奠居老幼無虞以及改歲繫神之賴
報事敢愆尚其顧歆永垂覆祐謹告

又祭土地文

維此仲春歲功云始若時昭事敢有弗欽蘋藻雖微庶

將誠意惟神監享永奠厥居

夏云仲夏應期時物暢茂

秋云維此仲秋歲功將就若時報事

冬云維此仲冬歲功告畢若時報事

歲云歲律將更幸茲安吉若時報事

改末句為
介以春祺

又祭土地文

春日載陽茲惟仲月式陳明薦用格神休尚其顧歆俾

我無斃

氣序徂遷時維仲夏氣序徂遷
仲秋戒秋冬序告中一陽來復

墓祭文

歲序流易雨露既濡瞻省

唐石改為載念

封塋不勝哀慕

唐石改為

不勝載念

謹用清酌時蓋祇薦歲事

唐石改為薦其常事

尚饗

又墓祭文

歲序流易雨露既濡念爾音容永隔泉壤一觴之酌病不能親諒爾有知尚識予意

后土祝文

茲以暮春修祀先隴

餘處改作按行丘壠

惟神保佑樵牧不驚敢

薦馨香式昭報事尚祈鑒享永賴無窮謹告

又后土祝文

茲以春餘有事先壠

唐石等處
改為丘壠

載惟保佑實賴神休式

薦醪羞尚祈據饗延於永久無有後艱謹告

又謁李龍學祠文

謹以釋奠之明日致祭於龍學侍郎李公惟此廟學實
公所遷人到於今追頌勞烈矧惟忠慮抑有前聞薦此
芳馨豈專報享謹告

次定回軍入粵



明倫彙編

三九

晦庵集卷八十六